

寄庵詩文鈔

寄庵詩鈔續四 巳巳

寧州劉大紳

花下漫吟

看花如選詩最要寬眼界清奇濃與澹盡在品隲內看
花如用人氣象嫌狹隘使我宰天下四海無中外世人
意見多不識造物大造物有全功何所不覆載藐焉此
一身淺乎丈夫態譬如含瓦石豈復得自在年老身亦
閒閒次無窒碍詩從已手出酒有人家賣一亭風月閒
稱意任人怪

山行

雲白山青處層層認舊踪詩情飛列壑杖影出羣峰半
路忽逢雨前灘疑有龍野人何太懶不種兩三松

東山最高處

千迴百折拂巖巒整頓精神試馬鞍問路有人愁日落
入山無虎畏風寒雲生只說到天上樵響纔知過嶺端
紫草紅花紛在眼老夫懷抱一時寬

古藤歌

紅石崖下泉水清電鞭閃爍雷車鳴中有蒼龍不敢出

老樹盤拳勢相伏百歲村翁一見之竹杖芒鞋走且仆
我來驚定仍細看欲尋首尾環無端已出層雲又入土
左縈右拂巖谷寒世上何人手種此知汝應後天地死
只恐空山風雨多逕化蒼龍向海徙君不見聖人龍之
賢人蛟不如崖上千尺青籐稍

開七吟

我聞古有語年少望老人五十未易到况是開七旬乾
坤如轉軸日月不停輪挽歌送富貴何問賤與貧既生
此天地不朽當有真求仙飲美酒兩者非僂民丹霄九

萬里鸞鶴難養馴一飲必一石家風有伯倫不逢禮法
士謬誤誰生嗔少年不足惜不飲多酸辛安得鷓夷子
游戲五湖濱

醉吟

昨日多收十斛麥今日醉眠醒不得無端鉛粉磨青銅
鏡中照見蒼顏翁大儒小儒競置喙神丹何處還兒童
我亦自憐復自笑藉如我今尙年少天長地闊須臾間
數十炎涼亦詩眊假我一千二百年廣成黃帝相周旋
百歲只如襁褓日常言稱老吾惑焉人生老少亦何有

孰爲朱顏孰白首
古人姓氏今猶存
但當長歌痛飲酒

病中夜吟

積雨天氣寒
冬夏變一刻
窻隙來涼風
中人如盜賊
其始猶徐徐
旣乃遂特特
我若當少年
披襟拜汝德
已是衰老人
頭眩目光黑
出內舌本乾
呼吸鼻端塞
夜臥裁初更
不知幾反側
共枕有小孫
安眠無雷國
寢衣強覆身
去之恐不力
昔如孫時我
祖愛憐極
去口苦無多
此境難再得
燈盡雞未鳴
候蟲有語默
吟詩持性情
叢書無疑惑
微寒何足憂
藥物苦相逼
苜陽與豨苓
一例

投有北待招素心人青山抱病陟

揚風

揚風挖雅爾何知小黠從來是大癡力盡孫龐因屬句
黨分洛蜀爲論詩春蘭秋菊原難少夏葛冬裘自有時
畱得生前門戶在墳頭鬼語尙相持

重遊龍潭釣魚阻雨宿祠下

曲徑芒鞋跡尙存危磯坐久石重溫空潭人影持竿靜
深窟魚鱗觸餌喧似有蛟龍依積水突來風雨失前村
山靈正喜忘歸客登涼月娟娟出廟門

風龍潭

爭將濁浪攪清流縱有龍蟠亦自羞孺子歌成空濯足
高人興到恐汗牛久憑巖穴非無地慣逐風波始出遊
可識寒潭明月夜雙懸鑑影照山樓

夜宿龍泉祠

欲投何處宿高閣正峇巽雲氣推門入泉聲到枕消身
閒秋有興夜靜夢偏饒空與仙人約誰聞白玉簫

宿山中二首

羲皇去人近忽忽遂至今來遊但飲酒愛此雲山深不

覺山色暮歸鳥喧平林樵牧亦已返濁醪各自斟歡然
卜其夜留宿無枕衾新詩改不已字字哦且吟此物何
足貴古意時浸淫譬如棄箏笛乃取無絃琴空林有遺
響幽泉多清音相視莫相笑山月來庭陰

臥起白雲內四體一無營此心與元化渾然相合并但
見山已曙不知月猶明鄰翁鮮來徃何有叩門聲開門
忽成笑相識忘姓名遺我尺半鯉兼之雙酒甌深山異
城市時復中其清便與客共飲况有魚可烹我醉客亦
醉頽然倚前楹人間少此樂可以畢吾生

年來親故凋零悲愴述懷因寄金門

寄生天地易傷神
衰老年年哭死人
千歲乘雲猶有恨
一朝化鶴是何因
荒村夜雨招魂魄
亂塚秋風起鬼燐
獨喜東門張老子
青衫皂帽往來頻

上華蓋山頂寺

山淺人如蟻
花開不可遊
逃禪僧醉酒
捫虱客談秋
野草埋仙塚
村烟抱佛樓
徘徊增歎息
欲去且遲留

寄高密諸詩人

詩家起高密
始見古人心
題目有佳境
文辭無外尋
星

河秋皎皎風雨夜沈沈自幸曾私淑荒山得苦吟
聲華時世貴根柢古人優名士中年定高文外國求望
仙離海嶠騎鶴到山樓携手長松下清吟不少休

晚饑戲作

辟穀原無術空腸且索詩如從忘味處忽遇大烹時分
膳千夫飽餘馨百代知齋厨回首望炊火尙遲遲
饑雀已無聲僧鐘飯後清攤書貧士味鼓腹老人情雲
氣昏虛牖燈光動暗城匏瓜星的爍欲摘恐天明

賦孔雀

層霄鶴雛絕難攀生長炎荒欲抗顏顧盼自矜凡鳥外
往來多在彩雲間幸無肉味堪延客却累名高易出山
若效雄雞能斷尾林泉飲啄正寬閒

溫泉

一池碧玉煖烟浮浴罷風清古寺幽此水人知說功德
是鄉我欲號溫柔山花澗草春常在熨女蠻童夜不休
可惜新都聲價重螳川遊倦不來遊

大魚溝

雨歇柴門外漁家曬網閒薪烟飛樹杪澗水落湖間人

似承蜩去魚如貫柳還投竿同一飽靜聽響潺湲

孤山

遠憶孤山上無人有月明荒林絕虎跡晚飯飽魚羹
醉數鴈千點臥聞鐘一聲逸遊及此日秋水片帆輕

仙人洞

龍閉雙潭雨山留一洞雲如僧何所住有席欲相分
聽梵高樓上尋碑古樹陰誰當驅鬼魅風月共殷勤
少壯遊山水已遊如未曾年高知不負道遠恐難勝
怪穴搜仙鼠閒雲問定僧題詩逕歸去扶我有雙藤

夢遊山

行到青天上猶無駐足時
酒瓢飛雨雹襪帶委虹霓
石徑橫空出芒鞋向外垂
古仙呼欲應與汝借龍騎

和焚香

人前忘此味正用睡餘焚
初試如無著將添似尙聞
風微簾早下氣靜袖先熏
入室本同類休矜門戶分

甲煎燒沈水都門只計車
皆言衆香國不似遠人家
小市千錢少初更一縷斜
深閨無事處指爪儘相誇

蓬山古樹根不待與招魂
燕處初心得灰餘正氣存
殘

梅香在畫片月影當軒適有故人至清談忘酒樽
閉戶餘香在門前已盡知難教化雲去無暇與仙期自
愛沈吟處相忘倦臥時寄書浮海客捆載莫遲遲

八月十四夜

屈指上弦後從無明月光中秋復幾夜高詠豈他鄉雲
散愁何在家貧酒自香前年一回首小院雨聲涼

中秋對月

掩抑浮雲已及旬甚難相見轉相親游山尙恐爲生客
對月原知似舊人萬里清光都付與一秋長句此鮮新

倚欄記是初更候遠寺鐘聲送曉頻

長見山頭與水濱相思何至歎沈淪共知天上非無月
豈有圓時不照人俠氣舊憐肝膽露衰顏自笑鬢毛新
田園況比他鄉好酒榼瓜盤次第陳

歌

中秋無此月歡情何所依天公如人意餘事皆可希况
我寸草心未報三春暉田園少樂事佳節情度幾毛義
捧檄喜輕易離庭幃老萊未真率戲舞斑斕衣兩者不
足顧但看月暈圍月華蚌珠大月圓魚腦肥孫曾團圍

侍瓜果香馥馥老人不耐冷初更爲掩扉胸中得氣味
枕上猶光輝我實凝且瘦詩興隨月飛不飲卽慷慨不
吟輒獻歎仙人倚桂樹左足影細微顧兔與蟾蜍搗藥
誰是非幸此心肝膽與月無少違浩歌夜已半百尺樓
巍巍罷酒聊假寐瞰出朝露晞

書

書法以人重非人不足存古人未書日於道培其根登
山望泰岱治水求崑崙巖巖石壁立浩浩河流奔森森
鬼神守勃勃龍鸞翻沈沈鼎彝氣鬱鬱雲雷魂殘縑出

敗麓望見名姓尊羣兒昧遠大車服誇鄉村其人先自
賤一錢何足論我年過六十始窺作書門硯材鑿端歛
圭璧堆庭軒麝煤氣味重含咀忘盤飧身羸腕愈弱目
炫神尤昏指揮無僕從更苦研磨煩偶然書在紙望古
慚來曩終難售市賣要使貽兒孫令知此小技未可輕
易言時輩贗作古付火猶銜冤真到古地位聲價看騰
鶩勉哉勿自棄卓立翰墨園

十七夜

夜涼獨鶴語高樓積霧橫烟去莫留有美酒時難獨醉

看明月外又誰求
衡雲太守禱何易
海市長公詩最優
可怪前宵人早臥
孤輪寒影自西流

游大龍潭登樓上

不唾深潭爲有龍
空中樓閣影重重
輕衫涼笠此間客
斜日澹烟何處鐘
歸路蕨橫畱一逕
前山雲起失雙峰
閒情更與仙人約
多種青青五粒松

樓上又一首呈諸故人

百尺高樓一日成
遠涵山色近潭聲
於今海內無長句
何處遊人有勝情
不喚神龍作霖雨
便呼天馬上蓬瀛

肯令猿鶴輕相笑一水雙峰浪得名

馬耳山歌

雙峰挿天如馬耳削竹生風志萬里壯兒身手空自誇
一聲霹靂失鞭箠權奇想見真龍形千秋上應天駟星
神物焉能絕雲氣世人徒見山色青頃刻雲來雙耳失
頃刻雲過雙耳出出如天馬行空時失如老驥伏櫪日
甘霖不作無農桑我欲騎汝驅驕陽天瓢瑣屑少稱意
倒握斗柄傾銀潢祇愁赤手鞚不住射耳東風吹過去
不如徑斫乖龍珠直到華陽館深處嗟嗟世事無不然

飛黃折斷珊瑚鞭衰翁今年六十二看山看雲過百年

鐵鎖橋歌

江流憤怒魚龍驕行人兩岸漫相招千尋鐵鎖出大冶
凌空駕就鼉鼉橋上有飛檐虛閣相回互下有古栢長
松爲撐住憑高瀉水到中間早被橫風吹作雨垂虹之
影睨晴江雌蜺欲下驚無雙赤鯉人長伏不起蒼茫落
日青蚪降初疑飛仙不敢上海市蜃樓自惚恍垂鞭委
轡飄然來耳邊時聞馬蹄響始信人從平地過尋橦度
索羞如何徒者徘徊騎者下軒窓又見涼雲多炎天傾

刻變秋候不藉清風舉兩袖笑看避熱橋下人一葉舟
中小如豆平生夢想盤江頭如斯奇觀吾何求但願石
爛水枯鎖不斷一年一度來題空中樓

暮歸自綠豆莊

割雞煮酒盡交情十里徐徐信馬行落日斜飛孤樹色
晚風遠送小江聲遙看半嶺羣羊動近入前村一犬驚
正值田家燈火暗疏星耿耿向空橫

上石樓梯

依然前日路夷險易初心人影峰頭細蹄痕石上深半

山無客舍他處有雲林誰信清秋日涼風未易尋

過三台山

清風不下嶺赤日不上山山上老僧安且閒客來不禮
門常關門前尙有人家住破屋補茅倚大樹兩三零落
不成村男出耕田婦應門見客讓客當風坐手抱松枝
去熱火客未及餉索酒嘗酒味清冽酒椀大日斜路長
留不得歸到家中恐昏黑回頭羨殺庵中僧一聲粥鼓
山鳥應詰朝我亦作僧去長齋繡佛愁未能

題畢蘇橋鹿雪樵詩後

弱者兩詩友蘇橋與雪樵世人非不識奇士固難招與
我周旋久相思夢寐遙五年新卷軸又束幾牛腰

再題雪樵詩集

到處無人到天生此亦難三唐幾門戶千載一心肝棲
嶽鶴巢峻食松仙骨寒分明前集在獨許老夫看

題耿希尹詩集

別有精華在乖時得古歡風騷此弟子河海一波瀾閉
戶無鄰問鈔詩與友看他年刻金石風雨不彫殘

題半隱園集

我自尊王李公論本不刊縱教今士異已到古人難遺
集真風雅老夫近瘦寒如何稱弟子涕泪夜沈瀾

題秋水亭集

君詩早平澹老至更如何關外鈔成帙人前頗作歌遠
遊生白髮舊屋長青蘿近日還山否秋空鴈影多

九日

今年重陽無風雨我欲登高不能去草堂未種秋菊花
一瓶濁酒長咨嗟醉後沈沈若有夢夢與仙人馭赤鳳
飛上太華高峰頭白日微茫蒼烟重西涼酒色何青青

仙人爲我招巨靈抵掌狂呼拊酣戰百神項縮誰敢聽
解醒只用如船藕一線河流不盈斗野馬塵埃亂紛紛
逕撐鐵航天上走天上九重清風多醉魄吹醒將如何
欲與仙人寄尺素廻鴈峰前無鴈過

憶菊花

俯仰成今古沈吟老樹根誰人完晚節此物種高門草
木本心在風騷吾道尊東籬一回首落日下荒村

不寐

不寐且哦詩詩成無寐時閑愁如可續好夢獨相遺一

夜寒燈其他年小友知病妻柴米累別自有餘悲

生日

不厄龍蛇歲不占少微纏增長犬馬齒六十有三年生
日不虛度輒題詩一篇因念唐詩人蒼蒼似無權郊窮
賀且天彼實傷天全甫白繼風雅胡爲亦屯遭高才鬼
神妬盛名日月懸斯其年與位乘除理固然邱爲九十
六詩難衆人先有母百餘歲久侍慈幃前母子皆上壽
此外姑舍旃我亦無賒願稽首告皇天願母松柏茂願
兒金石堅作詩固餘事安問傳不傳

浣江古廟

舊日聽鶡處忘爲何代祠粥香羣鴿下幡動一僧知社
雨村翁報秋風過客悲門前多落葉不賦亦歸遲

農家

才說登秋稼畊犁已不停人前爭夜雨牛後辨晨星水
淺魚鱗紫田肥豆葉青農書南北異遺誤未身經

看南山白雲

北之山巖巖雲壓其顛山爲伏南之山穆穆雲橫其腰
山爲肅山上山下青於藍一帶中圍白如玉量腹空洞

容幾人德懋帝錫上公服有時彩翠飛初陽五色繽紛
競馳逐衝風吹作霖雨聲灑向山前萬井足濟旱功成
人不知但見松杉暗膏沐雲白山青誰能私自愛輪囷
媚幽獨

天平山墓祭

十月十二日寒風曉凜冽遙望天平山今夜恐雨雪端
居不墓祭豈但禮難缺臥聽村雞鳴月落星未滅開窻
視山色巖壑分凹凸借人馬虺隤笑我足蹙躡忽然馭
雲氣升高不傾跌焚香烟一縷藉茅酒三啜早知椎牛

祭不如雞豚設紙灰零亂處中腸痛欲絕

上山日初升下山日已沒山中一回首皎皎見明月老
眼森然開清氣沁瘦骨歸路縱超遙停鞍且綫發俄頃
月當頭人影辨毫髮馬首自向西却背廣寒闕何時再
入山龜螭易短碣吾父身後名庶幾日月揭孝養生前
虧此恨終未歇

遊廣化寺懷沈龍山

青山之麓白雲深碧宇紺宮紅樹林疲馬來時如昨日
幽人去後只孤吟世間多是寓公跡我輩并無成佛心

百尺高樓曾臥處
松風長送海濤音

樓山殘雪

鶴擎餘寒在瓊樓
問玉沙夕陽銷不盡
夜月照還斜
白戰詩重和無錢酒
再賒幽人茅屋底
一半是梅花

夕陽

一杯饒逸興
人對夕陽山紅葉
不知數白雲
相與閒僧
寒村外立鳥瘦
嶺邊還竈突
終年冷炊烟
未出關

花影

沾泥投溷正橫斜
得此蓬門靜不譁
地亦欲香難就掃

影猶如舞况看花佳人鏡裏時相妬名士圖中盡自誇
却顧枝間無一語從今始解讀南華

山行

冲澗天氣失冬春曲折羊腸路亦新殘照斜翻霜葉樹
深山爛醉老年人詩仍前韻恐難盡畫第二圖愁不真
行客却尋佳麗處勞勞千里輾雙輪

賦紅葉二首

霜風一倍到城頭不似昨朝黃葉秋漫水聲中衰草岸
亂山影裏夕陽樓老餘白髮增新詠貧有清樽失舊愁

搖落人家不須掃任他滿地彩雲流

著書應在此林間四壁危巒水一灣
夕日殘霞全似樹晚風脫葉不離山
牛羊下處籟聲遠賓客過時筇影閒
欲折疎枝烹茗茗試教翠袖美人攀

續賦紅葉

山上停車橋邊倚杖夕陽紅樹興會天然不偏
不該難逃眾口曉起對景續賦一章非欲求多
聊以塞責云爾

天孫織錦夜初成裁作屏風趁曉晴
四面青山兩人笑一時紅樹與春爭
赤鳥屋上分光冷白鴈江邊見影明

不是霜鐘銷歇處雲渲霞染亦多情

晚約金門看紅葉四首

青山紅樹止網緼天下閒人我與君蕭寺惟嫌僧掃地
長林不厭鳥垂雲晚虹落澗徒能飲野燒延空只自焚
莫道晴霞朝爛漫相看終是愛斜曛

一世文章尙值錢幾人得似此新鮮干林絢爛歸平澹
萬古風流出自然只許松筠同暮歲待看桃李是明年
來遊苦恨精神少杖履猶能在衆先

小住山林又五年花開葉落盡懽然自知遇物無新故

不耐逢時有後先風雪打圍驚臥虎火雲燒樹墮飛鳶
英雄別有關心處問汝何人乞酒錢

半林落葉不分明醉向夢中聽有聲煮茗爐邊烟冷淡
圍棋局畔子縱橫漁舟和雪堆蓬滿樵徑隨風上擔輕
隔歲春光猶自遠飛花舞絮正無情

看紅葉又二首

鵝黃酒醉失長途五彩雲中馭鳳雛看過千林皆出色
拈來一葉未曾枯青山是處隨深淺白雪今年定有無
不識可能留歲暮梅花影裏共歡娛

扶桑若木 列如麻 周覽難乘下 澤草廿四風 間無此信
二三月裏 似何花 未曾落處 驚紅雨 常見空中亂 亦霞
夜倦歸來 人有夢 衰顏亦復鍊 丹砂

憶紅葉一首

赤藤倚壁 笑人癡 我亦登臨欲倦時 紅樹有情猶在眼
青山無語 不相疑 帳橫錦繡春 先借雲擁龍虬醉 後騎
待向仙家 問元圃 瓊林更長幾 千枝

瘦

士豈論肥 瘦忘情 亦是難隔衣 常骨見 置鏡暫心寬 駿

馬當風立豪奴倚醉看匣中雙劍在大雪出門寒
可愛韓夫子清時與睡宜情深披鬼怪氣盛却能罷投
贈多生帑吟哦少斷髭朋游喜郊島寒瘦又何知
不知如此瘦世上更何人但視今畱影全疑昨失真添
衣無窄袖書訓有餘紳願得風吹去天高不染塵

雪

紅葉無多樹詩情未盡刪天風吹雨雪一夜到人間晝
靜梅花覺門深處士關誰能騎快馬射虎向南山
我有黑羊裘前宵付酒樓四山皆雨雪何物可同遊象

雁哀無所羣
兀吠不休高
寒今若此
空爲世人憂

雪圖

一夜愁風雪
千秋好畫圖
山寒人影獨
木落鳥巢孤
道路嗟何遠
舟車看漸無
江干垂釣客
衣敝莫施朱

張永陽邀同金門樹敏華蓋山上看雪

登城斗見看
雪人近前於
我爲東隣忍
凍苦吟此何
有華蓋峰頭
一舉首四山
晴雪落吾手
高臺日暮寒
烟凝雷風煮
酒吹作冰持
杯勸客醉不
應長尾雄狐
臥古塚營窟
狡兎伏不動
黃犬蒼鷹聽
人用平原短
草經火燒

獵田馬上琵琶驕殘雪在地酒在瓢人生行樂願如此
閉門三日僵欲死吁嗟高臥袁夫子

十二月八日和碧桃花詩

春風遍處潤紅霞洞口秦人久住家却恐仙源易迷路
門前新種碧桃花

日暮天寒不可攀桃枝桃葉憶春山新詩和就梅花放
身在香風雪海間

王礪雲先生爲先曾祖作畫恭賦示家楨

先生抱道空山中王侯螻蟻將無同不識何年竟老死

後人不見簞瓢風奇峰萬仞插天起茅屋三間白雲裏
連衡接棟皆藏書賸有清清半江水終身無意求人知
聞名世上偏相思竹笋蕨芽少供給山雲水石多贈貽
冥思不須到天外住處仙凡判世界巖巖湍瀨驅眼前
快意如與風雨會俗客得之猶珍藏幽人什襲熏異香
到今海內無敵手前代沈周當雁行我家先人有德者
耄年心迹自瀟灑先生杖履來城中風雨聯床北窻下
此畫不知何年爲平生所作尤得意細看却同晚翠圖
於姓名上書七二荒林孤塚無誌銘後生攷古歎凋零

世有此人，不傳後家乘野史，徒汗青我昔州志預修。卷
先生師弟隱逸傳郡志，移入方伎中從事。誰歟何所見
試問曾讀明史不沈文諸公，以千秋道德難將藝術掩
卽論此畫真風流，畱傳到汝已四代神呵鬼守少破碎
子子孫孫其寶之先澤名蹟不可再

晚翠圖恭賦

礪雲先生晚翠圖古之逸品今也無是爲吾家先人壽
几杖琴書世共守我初得此成童時不能讀畫能吟詩
我有伯父顧謂予惟予與汝汝寶之先生如龍潛不見

餘事流傳人爭羨高齋風雨成此圖汝祖實與役筆視
輕裝萬里過都門濟南載去烟雲痕秋水詞人述長句
歸心直到江上村一瞬百年跡若掃三世先壠長宿草
通靈神物原不多况我形容亦已老君不見東南巨室
包牛酥先生真蹟遭點汙苦心孤詣何爲乎豪儉巧奪
猶吾徒

再賦晚翠圖

畫中有我人則無先生用意如倪迂如何此幅貌二老
夕陽欲盡歸舟孤先生實爲先人壽上書某翁下弟某

一賓一主成千秋此外茫茫復何有兒孫勸我題新詩
長愁錯繆生矜持鏤金刻石尙慎重名公筆蹟先世遺
當時原無墨點誤豈許蒼蠅集毫素客來盡使知我心
爲爾盤中設寒具

華蓋山頂寺梅花同金門賦

種向名山最上層開時曾伴讀書燈一雙老眼尙如舊
萬樹春花難作朋仙去已無千歲鶴詩成可有六朝僧
高樓欲訂重來日短笛橫吹怨不勝

雪中賦梅花

世間清境卽蓬萊未有仙人不詠梅大半冰霜寄心跡
無端桃李作輿臺今朝真向雪中見何樹肯從春後開
更幾黃昏卽除夕祭詩先祭此詩材

雪中憶華蓋山梅花

枯根朽幹聳奇觀苔蘚烟雲共屈盤無幾枝花詩意遠
有如許雪酒杯寬摧傷樹歷千年在老病人經一日看
不柰山僧心厭客閉門未許再憑闌

寄菴詩鈔續五

庚午

寧州劉大紳

福山鹿使君見過言及棲霞牟松岩侍御已於前
年歸道山矣泫然有述

金碧歸五年海岱思萬里尺書不易到故人難至止前
年朱生書附及方生死今見鹿使君聞喪牟御史高密
王先生同是齊男子言官噤無聲良朋呼不起怱怱又
送別鞍馬去不止相見復何日世事如流水

綠梅歌

庚午

仙人遺我綠玉杖明珠纍纍綴其上
驪龍睡穩鮫人潛
老蚌沈淵不敢向玉斗量珠價無數
難買春風第一樹
倚樓莫送羌笛聲我與仙人約久住

孫鳳藻招飲戲答

洞口花未開山中酒已熟
山人不厭客語客來不速客
欲來出無車客不來食無魚
欲來不來日已暮花開時
來意何如

題桃花源記後

我讀陶潛記蓄疑未一剖
漁人窮桃源林盡入洞口
冊

池與桑竹一一皆記取桃花更不言或者已無有洞外
多桃花洞中但雞酒仙人亦俗物欸客意空厚我若爲
漁人釣竿日在手輕舟汎桃花細魚貫楊柳呼兒持向
市醇醪換一斗醉歌歸去來洞門不復叩笑語桃源人
此意君知否惜哉我與公相去千年後

遊萬松山至丈人石下

身與青山近心隨白雲遠遙望未云足因依歎屯蹇木
石本忘情我輩自縉緡思當少年日眼明脚力健罷酒
高樓中斜陽數往返及今雖昏眊尙自樂嘉遯天石不

同類煉之補其損如以石補石豈不更深穩轉思億萬
年天地又混沌五嶽安所歸試讀媯皇付此心終未平
久立訴忱惘鬼神亦餘怒迴風起絕巘阨谷羣羊伏坡
陀百草偃丈人卒無言西山白日晚

花間吟

朝日沈沈烟裊裊春禽樹上呼春曉未及清明花已開
蛺蝶飛來苦不蚤老夫愛花如少年綠書曾奏東皇前
乞取三萬六千日長歌短賦相流連香風吹入天上去
敢作彩雲空中住仙人綵服騎鳳麟乘興共醉花深處

原缺

偶思昨夜初停杯忽聞枕上風雨來顛倒衣裳失新夢
名花將開猶未開風雨情深不肯惡轉是拘儒好輕薄
神仙富貴爾何知一曲闌干看綽約東皇用意經十分
色如染徧香如熏祇許芍藥爲近侍白李紅桃徒殷勤
老夫若生于載上天地文章未縱放根皮瑣細供刀圭
正恐無此好花樣有花有酒何須憂仙人欲去牽衣留
今夜中庭少月色煌煌燐燐燭眠高樓

花下醉題

短垣圍竹與肩齊曲徑蕉陰路易迷曉雨花開人已醉

春雲客散鳥還啼，數莖白髮心多感。一代紅顏首盡低，
滿苑香風吹欲暮。新詩懶向壁間題。

西山竜三首

十里無烟火，孤村山上出。投宿携子孫，灑埽有蓬篚。星
光掩初月，雲氣壅斗室。山高春正寒，布衾不暖膝。小孫
徹夜語，雞鳴未可必。居人亦不眠，常恐牛馬失盜賊。今
更多去來勢，迅疾山上及山下。安枕思昔日。

山行趁山曉，未飯先秣馬。徑窄牽絲韁，寸步敢苟且。亂
風吹傾崖，落石如大厦。疾行穿石過，峯頭俯鳥雅。細認

所來處不復辨屋瓦夜宿已天上曉行天在下顧語吾
孫子置身得此寡落落烟雲間開懷共傾瀉

爛漫山花開香風生衣袖山靈與行客相貺意良厚白
日如不落言旋豈必驟云何大雨雹雷霆勢交鬪馬驚
先自奔策杖從其後汗喘青松間行雲已歸岫晦明俄
頃分險夷斯須觀靜坐推物理呼兒煮春酎

深山吟

我行深山中常見夷人泣問之已再三欲語復嗚咽身
上衣不完屋上茅不葺山田瘠難畊一穗無幾粒塲圃

絕鳥雀誰與共緩急賴有牛與羊戢戢亦溼溼巖谷爲
圈牢四圍山崆峒自畏虎豹噬豈向盜賊揖盜賊知夷
懦晝夜恣出入公然驅之去追逐不敢執欲不愬有司
恐以匿盜繫有司今慈仁萬民思安戢夷人州前繫盜
賊市上立夷盜皆赤子禍福不相及我聞心腸悲循吏
前後襲白傅去我久孰賡長慶集

同金門携子孫輩遊召保冲龍樹間

坐食慙農夫出遊問阡陌阡陌旣以開田間徑逼窄往
來不逢人尙恐勢相迫步趨屬子孫措足先謀畫春暖

水長禾風生浪翻麥萬物不違天及時受恩澤老農携
婦子煮豆乘其隙樂事隨所取不以智愚隔我輩值衰
朽歌飲忘主客寧知身世間寂寂與赫赫山木出虛空
怪石自崖峇若非龍蛇窟定是神仙宅石爲碑碣憂木
有斧斤厄赤幘而絳構衆中多伍伯囚民農爲重維士
羞巾幘商富工奇淫莫爲腐鼠嚇雕琢喪大璞染入失
純帛先民久淪亡卽事多指摘言尋舊路歸吾已欣有
獲

午食煮豆

凍餒憂萬物午饑不自了客携青蠶豆到門索價少廚
嫗然松枝竈烟出屋小我生嗜非偏欣欣腹已飽田家
自矜惜翻說味不好北去無此物梁肉何足道

又食煮豆

此客真信人使我又一飽其價曾不二其味似更好癯
儒秉賦殊齒牙凋零蚤其落豆實成既堅乃困老及茲
軟美間量腹受多少僻嗜非蒲菹亦復異芋棗如何
中人方期拾瑤草

獨占蘭

瓣色白大倍常蘭有殊少點香烈一莖一花高出葉上孤飛燕亦一花然莖短伏葉間不相同也

此亦一香祖爲獨不爲同有美難自抑挺出枝葉中得名固俗好亦復形容工九畹益百畝蕙芳自叢叢聖賢不一姓千里殊西東向使限資格造化非至公塞北斥鹵地一望知蒿蓬蘭蕙安能爾異論嗤愚蒙草木有本性試問看花翁

聽鳥

霏霏細雨後睡起新夢無偶成詩五字已盡酒一壺詩成無人和酒盡無人沾坐聽樹上鳥妃匹相歌呼歌呼

豈有極我亦得歡娛林深絕彈射更少鷹鷂虞鳳凰一
來否休與雕籠俱獨聽汝莫笑明日招吾徒

珍罷雨復作衆鳥收其聲聽雨如聽鳥洋洋雙耳盈人
生得意處豈在聞韶英庭前小草木於茲遂生成瓦甍
注檐溜尙恐春易晴老翁日抱甕亦如農力畊有備始
無患不獨適性情鳴鳩爾何事逐婦矜善鳴

鄉中見畊者

老牛不抵觸負輓耕新田老農不游惰策後施長鞭饑
有送餉婦倦則放牛眠卽此古風俗何必佳山川携孫

復携杖行止心怡然鄉村閒人少望見如神仙第恐老
農諄不如巢許賢我豈混商賈鬱鬱居市廛老農聽我
語與汝長周旋

邱塚

有不祭者叩之則曰非吉壤也悲而賦此

邱壠必吉壤祖宗無食所拜埽必貴人孤嫠無祭處新
土添舊墳寒食畚鍤舉青青垂楊柳紙錢舞白紵日落
兒孫歸塚中鬼相語南鄰亦纍纍不見淚落俎狐狸搯
成穴車馬游何許葬師今悞人我聞倍悽楚

看插秧

陰雲覆長路亭午可出遊風生白羽扇
吾意如清秋農
家苦樂並插秧滿田頭村婦不解歌笑
語時相酬所惜
天久旱枯槁引清流衣食願未奢不雨多
綳繆閒觀愧
力作晚飯羅珍饈田間共一飽聊與分
殷憂

旱

自我作田父始爲田父傷家家買酒肉
四月栽頭秧原
泉日就竭膏雨成空望
蝦蟇與蝌蚪對泣聲
噹噹甘心
逐螻蟻駢死桔槔旁
太平有景色祇是多
農桑禾苗未
入土安能收
稻梁州家有符下
促迫修官倉倉中
何所

有有鼠貪如狼倉上何所有有雀飛且翎老農幸無事
力役甘輸將官倉未修畢田中秧已黃催科署上考但
恐民流亡

雨

五月十日

霖雨久不作歲旱憂農夫饑寒不足惜何以完肌膚昊
天如父母聚族私相雪豈無好雲物柰何風氣麤今夕
是何夕更不煩神巫前檐注飛瀑澎湃傾庭隅兒童倦
已睡枕上爭權呼披衣起欲舞未免嗔其愚擁衾索好
句與兒愚不殊既喜中夜雨復恐朝來無孰持造化柄

毋乃愚且迂不如第安寢今年可無虞

弄孫

荷鋤理田園蕪穢鮮所獲梅實如金丸愛玩不忍摘弱
孫過其下齒酸口生液老夫戲與語不揖不輕擲前賢
米五斗尙難爲腰惜茲實和羹材可少長揖客望久渴
已止邈然憶疇昔風雪花初開月明靜無迹未知今年
中寒香在何夕與汝培本根莫嫌此土瘠華實恆相因
第當慎狼藉

鄉村

鄉村一夜雨溝渠千農夫豈不戀枕席凍餒家室俱惜
哉少禮讓忿爭在斯須鬼神司禍福偏不忘庸愚市兒
尙械鬪赤血流長衢椎牛更擊豕醜酒相歌呼蒲鞭置
不問哀此無罪無不如竟不雨安眠勢無虞廉泉在何
所爲我滋膏腴

雨

三百六十日三十六夜雨是爲太平世此語傳自古豈
知南人心如斯尙無取要作傾盆翻何止破塊數朝來
萬井白綠苗夕如舞計日成歲功蝥賊素未覩上天愛

下民北人如南土出遊止田間微疴久已愈杖履濕無妨豐年少愁苦

我有霖雨圖得自東海岸中有非常物蜿蜒及天半蒼生不望雨棄置在几案懸之輒生雲兒童笑指看恐茲適偶然徃徃濟歲旱前月西山中詩人賦雲漢出張素壁間肥蠟遂遠竄乃知通神物不徒作奇觀素練藏千年鼯鼠莫嚙斷

雨中獨吟

清曉雨才歇未午旋續之力作憶鄰叟遊戲看童兒擔

溜積屋下澄澈如清池城頭注紅水赴壑驚脩蛇往來
覆簞笠衣履猶淋漓歲旱見雨樂河決聞雨悲悲樂素
所歷徃徃形諸詩不如此黃口得意無言辭

市人重錢刀農夫惜泥水水流不上山田荒不救死平
疇足膏澤秋風粟無稅相爭未可非相讓致足喜林林
荷鍤立饑劬率婦子聖王抑末業不以彼易此莫羨黃
金多買輸服青紫

六月四日趙東曙遺西洋菊花

風雨蕭蕭不待秋一枝汎汎海西舟移人未必中原少

玩物偏憐外國尤要使相看無熱客可能對飲有清流
與君更到重陽日好共茱萸插滿頭

雨中看紫薇花

紫薇花樹手親植今年昂首始看得炎炎烈火燒晴空
雨中赤焰不曾熄海水浴日日有光江波濯錦錦生色
應笑春花怯春雨低枝媠媠盡無力

紫薇花

海上塵飛一丈高偶來樹下共遊敖何緣耐癢如人背
欲借仙家玉指搔

老眼

輕雲細霧眼中生百遍逢人問姓名轉悔疎狂年少日
無端青白太分明

除蛛網

盤踞門屏自吐絲經綸於汝本無期兒童莫任張羅網
栩栩仙人欲夢時

養蠶能得幾絢絲異類紛紛去不疑要識老夫原媿媮
笑看嬉子上衣時

漫天罩地已多時四角中央亦自疑促織墻陰聲切切

聽來原不爲蛛絲

賦竹間龍瓜花

雲氣青青覆竹根無人知道是龍孫
山中一夜風兼雨曉起庭堦見瓜痕

星回節

六詔烟消落日空松明餘焰劫灰同
斧斤響徹羣山外火炬光生一夕中
歷歷星辰隨漢月茫茫雲霧逐夷風
紫薇剩有花枝在還向城頭照眼紅

星回節俗謂火把
節紫薇花適開亦

呼爲火
把花

賦蛟螭

七月初三日

樹底翩翩識化機，不同鶯燕送春暉。
曾呼輕薄名原愧，卽認逍遙夢亦違。
圍客繭空垂五彩，仙人裾碎見雙飛。
莫教榻入蒲葵扇，已近秋風識面稀。

浣江橋東道旁無字古碑

白石峩峩立幾時，千秋又見謝安碑。
行人下馬披苔蘚，古道斜陽鳥雀悲。

憶蘇橋寄故人

夢斷秋風起悠悠，不自持空山百靈下。
遠道一心期老

病異鄉客窮愁名士詩朱家今意氣莫負死生時

藏書

藏書在小樓日日樓上頭異代如相感今生已幾秋深
交離富貴好句戀窮愁醉夢無奢願名山續舊遊

桂樹續吟

庭前好桂樹慣與秋風親種之十五載歸自東海濱俯
拾既已是又復取諸鄰譬如得賢主尙欲招嘉賓草木
雖微物亦憐氣味真蘇合與糞壤始不同器陳陋儒分
疆界望見蚤生噴蕭森竹與栢無花且逡巡天香塞茅

屋醉醒容吾身多多益善耳此意與誰論

讀書桂樹下

年衰賞心多讀書與種樹樹根挾一編風來亂竹素遂
從中間讀不復尋乙處老人貴適意豈必理章句客來
失送迎徃徃責謬悞不畏出門遠常恐逃道路臭味易
參差風氣非前度花間有清香書中得深趣依依樹頭
鳥啼聲無時住

山中二首

高樓危坐者誰子置身萬壑松聲裏床頭堆疊宛委書

亭外飛懸瀑布水水邊謫仙天上人海風江月詩常新
盪胸振耳無不可此身久已離羣塵生愁照見鸞鳳影
猿在深巖鶴在嶺百年不到人世間襟期瀟灑骨格冷
多暇定扶雙赤藤六朝古寺同尋僧若教後生侍杖履
扳林踏閣看飛騰

近松屈曲盤龍虺遠松挺直森戈矛脩竹因依近松下
殘雲繚繞遠松頭松間結樓一百尺此是仙家萬古宅
草亭瓦屋相對開蒼苔徑仄少行迹何代蘭若凌太清
鳥飛欲墜孤烟橫不知松樹更多少落日但聞鐘磬聲

幽人長嘯絕壑底箏笛不入聽松耳一道飛泉天上來
亦應撫琴彈淥水

對月作

謂天無情天無月謂月無情月不圓今宵誰是無情者
負却明月孤青天一杯不妨兀兀醉一枕莫遽昏昏眠
呼孫與我看明月如此良夜非偶然清風不捲浮雲去
雖有明月徒高懸清風明月不用一錢買爾曹可知李
侯真謫仙震動千古此佳句妙處不獨如陰鏗騎鯨去
已不復返照人月色如當年地上之影那可數無端罔

兩相周旋君不見高齋昨日一夜雨孤燈四壁寂無語

律詩一首

鐘聲杳杳漏聲遲雲霧重重一夕披白月爲誰光若晝
清秋從此澹於詩寄書遠道懷人處罷酒高樓墮影時
溼露桂花香未竟夢中猶自賦相思

中秋夜醉歌

中秋明月不易有今夜團團上天走
苦吟豪飲才相懸
詩家何人不流連問月曾經幾人賦問人曾將幾詩傳
詩人與月齊無語清風謾謾庭階前清風明月一時有

人間不用張華筵華筵多燈燭終夜盛管絃酒不邀明月醉夢不抱明月眠月之來東海邊月之去西山前東西道路經萬千其始與終是何年有情無情任自然人在高樓月在天月兮月兮誰相憐

送龔氏妹

由撫仙湖歸

送汝出門後北風吹雨寒我身曾閱歷世路本艱難誰使衰年恨常懸別淚看他人強慰藉今日定平安亦知歸去後汝有子孫歡直待僕夫返才能愁思寬風波湖上闊烟火渡頭殘夜雨蘅茅下衣裳正苦寒

庚午

七

過李氏山房菊花正開

鴻雁無聲蟋蟀悲一雙蛺蝶寄相思曾經幾夜秋烟裏
不似前年暮雨時杖底南山還入畫樽前白髮盡成絲
狂歌才子今何在灑淚西風獨賦詩

謂董勿軒

殘菊

殘花殘客莫相疑開在霜寒正不遲却爲經秋先出色
空令對雨晚吟詩徃年白雁聲中見昨夜清猿影裏知
若遇鄰家能送酒携樽休更問東籬

年年黃葉雨中村竹杖蓑衣徃叩門人自多情宜有累

花應極澹竟無痕酒杯月入幽齋冷蟲語風傳小院喧
正是傷心詞客盡楚歌不獨爲招魂

答張柏軒明府

金閨一席杳難分付與銅章繆篆文直待三年才報最
誰知兩月已空羣民情旱歲望霖雨吏治清時見慶雲
第得初心能不改循良有傳敢遺君

百畝田間一草廬老農風味似當初養親歛歲思兼膳
課子陳編憶五車秋到長天空射雁水流斷港不叉魚
衰年又失論交友積恨陶朱計太疎

謂勿軒

刈稻

力田不逢年八月北風早綠禾挺白穗一望盡枯槁四
體非不勤稼穡信爲寶躊躇停鎌刀惜此數莖草妻孥
忍凍餒幸使瘠牛飽往年杵臼間猶嫌米粒小糠粃亦
珠玉糲板聲已杳太息空歸來長歌心如擣茫茫億萬
里度幾似此少一隅獨饑寒吾意甘衰老

憶菊

黃花不肯入城市秋風昨夜山中開有如幽人在空谷
俗士相招頭不回未知幽人竟何似我已姓字甘沈埋

去年骨力正強健一日一度籬間來有時醉臥忘歸去
孤燈對影呼餘杯清霜如水注屋瓦披衣蚤起爲誰催
下床相覲兩相笑一朝老病顏衰頽夢中尙作叩門響
苦吟未就寒蛩哀

看菊贈李子

能於羣卉中超然種秋菊卽非隱君子亦已脫塵俗孤
潔傍高松荒寒倚修竹南山有白雲清晨入草屋夜靜
不歸去自向檐前宿我欲因白雲烟雨時寓目此意寧
非貪讓君適幽獨

秋葵

山花澗草避西風一樹獨開秋雨中
入畫不摹黃峽蝶
圖成顏色恐相同

芙蓉

花開木末澹雲封秋色不同春色濃
信得顏家詩自好
難教初日賦芙蓉

無魚

畜鯽稻田歲旱水涸異物恣食不留一鱗
秋穫既竣作膾無由慨然有感發爲長歌
農夫有奢望魚池卽稻田秋風入隴畝
稻美魚亦鮮豈

有蛟龍種挾之飛上天坐令彈鋏客舉筋長垂涎其初
不經意行藏聽自然少視無游泳疑向深處潛長鏖風
蕭蕭短莖峙疎烟至竟不撥刺撒笛空手還乃知魚得
水在田如在淵龍湫不作雨桔槔中庭懸蹄滲亦涸輒
溼沫徒相憐聚泣求升斗作書無由傳神龜縱解事蛇
懶出入便永飽異類腹難供主人筵先師遜農圃爲其
勤且專不授漁人訣索膾須市廛戴星且餐飯今宵可

忘筌

夢尋菊花

義熙問人骨已稿詩情酒性壓不倒我今時時夢見之
清風高節晚更好門前一逕蒼苔稀黃花不落不須埽
秋烟秋雨深相知殘尊餘瀝笑人老此生事事隨緣灰
醉鄉睡鄉未易了阿誰化蝶何翩翩飛來恨遲飛去蚤

調種菊

荒園有菊客不俗晝吟夜夢快所欲君家種得一千枝
尙嫌無葉日蹉跎霜風一夜來墻陰百草爛枯受約束
幽人開甕傾清尊獨與黃花寫心曲孤芳晚節無他屬
有葉無葉何榮辱

夜雨

青山人已老白首夢何之夜雨燈前酒秋風枕上詩暗
蛩依北牖殘蝶在東籬明日登高宴黃花恐不知

九日同張金門重飲李氏山房

秋秫如雲路半遮出城卽與到君家暮年不作他鄉客
佳節重尋舊徑花皂帽風停高處著白衣酒盡醉中賒
莫嫌二老頻來往有幾幽人共晚霞

月夜

涼風吹積雨明月一樓寒衆影凌虛瘦羣聲赴夜殘山

空如不落人老共誰看十載半裘敝秋深久坐難

吟詩

好詩如良朋每借風月至相與一室間萬象共遊戲邇
來瘦如腊或謂是詩累便欲廢吟哦金石晝夜餌昨朝
過北邙高塚藏骼髓下馬讀豐碑官衙勞勳履東山一
短碣上刻詩人字不假諛墓文聲名塞天地好詩未易
得良朋安可棄身後此榮施生前此樂事

佛手柑

落葉秋風一草堂雙柑沈浸酒餅香分明丈六伸金臂

提挈衰翁入醉鄉

城上看西山積雪同金門

臥衾如寒水蚤起雞初鳴願得雙黃鵠騎上白玉京
京不可見積雪照荒城東南浮雲裏瓊瑤未分明高望
西山上玉田何縱橫仙人耦不足獨自難深耕常恐銷
融易山色空有情閉戶苦凍餒出門愁遶征相與女墻
上夕日快新晴裘褐各自適澹泊無所營路人猶竊笑
癡狂兩儒生誰知登眺處同有歲寒盟重雪期今夜白
雲已英英

出門

東南行色上征鞍，
載狐裘怯曉寒。
留語松山紅葉樹，
好同翠竹報平安。

重題鐵鎖橋

遲遲笑語度長橋，
隔水聞聲不待招。
一葉舟中人影小，
千尋浪外馬蹄驕。
江空日上龍鼉背，
岸闊雲橫蟒蝮腰。
記得曾爲題柱客，
木棉花發雨瀟瀟。

雲峰寺

日短山深晝不眠，
青松煮茗淡生烟。
道人少汲潭頭水，

留作寒崖瀑布泉

龍潭

橫風入長林斜日出高閣
昂首看瀑布疑自天上落
忽到源頭來綠水洗赤脚
第聞雷雨聲蛟龍影無著
睨視空中雲輕輕沒半壑
試汲一瓢水暫將苦茗瀹
寺僧有青松不用埽殘籜

蚤上三台山

客飯燈花燼江流送曉鐘
斜尋新石路直上舊雲峰
濕霧傾高笠寒風折短筇
山僧初出定煮葍拾枯松

茅廬

茅廬更千載是否說州城木落遠山立樓空寒月行人
先墻草瘦詩後寺鐘清迴憶今年裏不聞秋雁聲

賦紅梅

自臨淥水洗鉛華一旦風流分外加直似多情傾竹葉
何曾降格學桃花清雪後融朝日澹澹烟中絢晚霞
千載流傳詩品在空山落月美人家

磨墨

學書既費紙亦費筆與墨運筆不經意磨墨用全力手

腕千萬轉半日始一息與水未交融揮灑白不黑慘澹
如陰雲點畫難辨得我少悞求工衰年爲人偏子弟與
奴隸徃復共其職有時自周旋俄頃困硯北痺痿羞未
吏投檄先自劾乃知道無物有物皆爲賊磨人聽所爲
啜之長心盡

漫吟二首

天地旣久長聖賢何寥廓富貴無胸臆貧賤有寄託白
鬚固蕭疎又復觸手落落盡何所悲詩成判好惡每笑
楊子雲於道得糟粕法言擬論語無端投高閣其書不

可毀其人大可薄

茫茫千萬古紛紛幾毀譽丈夫志固窮市兒愛朱紫大
聖與陽虎其貌乃相似若第論富貴鉗徒定取彼皮肉
依附間安知非與是請相方寸心清清如秋水

題鐵鎖橋有餘興暇日復爲二篇

徑向虛空度江流氣亦平猶疑舟上下不辨日陰晴復
道無人見重門縱馬行飛仙常自負來往有餘情
從無江上客爭渡尙喧呼第見停鞭視長聞載筆圖到
時詫神鬼歸日語妻孥鐵鎖千尋在衰翁杖不扶

漫興

我歷佳山水徃徃如舊遊
檢點百年內未停車與舟
精神不內守夢寐良悠悠
萬事盡如此一覺卽千秋
昨夢還想像今夢又綢繆
瓊瓊夢中物螻蟻與王侯
天雞喚不醒神鳥上高樓
寄興只山水於吾何所羞

詠盆梅

已向盆中老吟哦尙有人
林泉同此味庭宇自爲春
凍折琴相近披殘蟻作鄰
移根巖壑裏長伴百年身

詠瓶梅

一枝纔欲放情少折應難
香稱尊彝古清分澗谷寒
載時驢影瘦插處麝烟殘
今夜無明月燈前獨自看

詠蠟梅花

青山白月半輪銜舞曲重
翻態不凡却恨霓裳顏色淺
避人新換浚黃衫

銷寒夜半醉流霞噓氣如蘭
正自夸不信深山殘雪後
分人幽興有梅花

尋梅花

斷橋影外古橫槎幾夜相思
一徑斜臨水未栽千百樹

依山只住兩三家僧歸小院禽能語客到重門犬不譁
莫向城中傳好句教人知道有梅花

反東野寒地百姓吟

長夜重屋暖美人更侍眠曉雪一尺落醉語呼張筵銅
爐簇炭火玉堂雜管絃貂衣映四座爭助纏頭錢微風
不得入額汗珍珠圓貧兒望天曉呼號及門邊不作主
人大低頭厭腥羶腥羶易飽煖難到主人前闌人麾之
去主人今聖賢

書誤字旁

出口方吟哦入手已謬誤
兩物皆我有自省實憂懼寸
心得所養雖寐不馳驚不撓
泉水清不搖木根固請看
深澗中森森古柏樹

戲賦白鼠

青麟元鶴久無奇白鼠何來得
暫窺獨出雪殘人不覺
潛行月暗狸先知太倉飽食拋
紅稻燕寢輕裘緝素絲
若見銀毫應更妬含丹吮墨有
微詞

新居

自愛新居遠市間石橋影裏水
潺潺別尋小徑長如認

每見孤村便覺閒無酒不嫌邀白月有錢尙欲買青山
逢人笑指烟雲外多少詩成未就刪

贈趙敬脩

襤生罵人阮生哭兼罵與哭先生獨有熱者血斃者骨
寒不裘饑不食肉小兒嬉遊受百福聞聲走避恐不速
九十老翁何心目世上幾人額鼻願先生之友張與僕
賦得冬日可愛

老臣家在南極下羲和門前駐車馬庭檐曝背歡情多
竹書生光手常把赤文綠字飛仙蟬微茫點畫艱搜尋

低頭望見地上影炎烟欲熾寒不侵老臣思獻愛日賦
未及書紙先長吟先長吟恩何深負在背抱在心朝馬
中晡夕不改晴霞照耀桑榆林氤氳紫氣盈衣襟露肘
起舞光沉沉黑貂之裘何足云南極下無伏陰賦愛日
情難禁

梅花吟

殘月如鈎水如練獨自照影無人見我有新詩寄其間
沈吟恐逐落花片妻孥怪我爭喧呼柏酒椒盤曾有無
今年送歲只五日白眉脫盡空腸枯我如不聞自遊戲

惟應梅花解人意詩在欲成未成間暗中香氣時一至
剛道畫難詩亦難更有何物同高寒世上燕支不用買
詩成且向枝頭看

蘭花吟

幽人之宮小如斗一畹蘭花爲誰壽葉如古劍沈秋潭
花似輕紈出素手平生吟詩一千首對此無處置吾口
瑤琴古澹不能彈况敢歡呼琥珀酒是時斜月落窻牖
世上凡卉一無有水邊止剩寒梅花天以兩物作良友
殘夜正襟危坐久安得陶謝與韋柳清香靜氣無時無

或聞不聞世知否

除夕前一日浣江橋畔看梅花

更向江頭坐不妨無詩無酒亦尋常
晚風莫盪橋邊水
中有梅花影與香

除夕重赴浣江橋頭看梅花

西山影裏亦吾村此來懽然爲抱孫
更約梅花同舊歲
浣江橋畔共黃昏